

摘藻堂四庫全書薈要

子部

欽定四庫全書薈要

子部

欽定授時通考卷四十八

九

詳校官主事_臣陳本



欽定四庫全書薈要卷一萬七百十一

子部

欽定授時通考卷四十八

勸課

本朝重農

勸諭二

世宗憲皇帝

雍正元年

諭戶部朕臨御以來宵旰憂勤凡有益於民生者無不廣

為籌度因念國家承平日久生齒殷繁地土所出僅可
贍給偶遇荒歉民食維艱將來戶口日滋何以為業惟
開墾一事於百姓最有裨益但向來開墾之弊自州縣
以至督撫俱需索陋規致墾荒之費浮於買價百姓畏
縮不前往往膏腴荒棄豈不可惜嗣後各省凡有可墾
之處聽民相度地宜自墾自報地方官不得勒索胥吏
亦不得阻撓至陞科之例水田仍以六年起科旱田以
十年起科著著為定例其府州縣官能勸諭百姓開墾

地畝多者准令議敘督撫大吏能督率各屬開墾地畝多者亦准議敘務使野無曠土家給人足以副朕富民阜俗之意

諭禮部國家祀典必貴誠潔

先農壇每歲展祀且為親耕耤田之所最宜清肅舊制圍牆內有地一千七百畝以二百畝給壇戶種植五穀蔬菜以供祭祀餘一千五百畝每年交租銀三百兩以備修理聞康熙四十年間內務府撥給園頭耕種菜蔬盛

蔬菜無所從出惟向市井採買殊非潔淨精誠之意今著園頭清還地畝仍給太常寺壇戶耕種以備祭祀之需餘地一千五百畝著將內外牆查明丈尺每種地十畝估計令其修牆若干務期加謹葺護毋致傾壞每年將太常寺少卿派出一員不時稽察

雍正二年

諭直隸督撫等官朕惟撫養元元之道足用為先朕自臨御以來無刻不厯念民依重農務本業已三令五申矣

但我國家休養生息數十年來戶口日繁而土地止有此數非率天下農民竭力耕耘兼收倍穫欲家室盈寧必不可得周官所載巡稼之官不一而足又有保介田畯日在田間皆為課農設也今課農雖無專官然自督撫以下孰不兼此任也其各督率有司悉心相勸並不時諮訪疾苦有絲毫妨於農業者必為除去仍於每鄉中擇一二老農之勤勞作苦者優其獎賞以示鼓勵如此則農民知勸而惰者可化為勤矣再舍旁田畔以及

荒山不可耕種之處量度土宜種植樹木桑柘可以飼蠶棗栗可以佐食柏桐可以資用即榛楛雜木亦可以供炊爨其令有司督率指畫課令種植仍嚴禁非時之斧斤牛羊之踐踏奸徒之盜竊亦為民利不小至孳養牲畜如北方之羊南方之彘牧養如法乳字以時於生計不無裨益總之小民至愚經營衣食非不迫切而於目前自然之利反多忽畧所賴親民之官委曲周詳多方勸導庶使踴躍爭先人力無遺而地利殆盡不惟民

生可厚風俗亦可還淳爾督撫等官各體惓惓愛民之意實心奉行倘視為具文苟且塗飾或反以擾民則尤其不可也

諭直省督撫朕惟四民以士為首農次之商賈其下也漢有力田孝弟之科而市井子孫不得仕宦重農抑末之意庶為近古今士子讀書砥行學成用世國家榮之以爵祿而農民勤勞作苦手胼足胝以供租賦養父母育妻子其敦龐淳樸之行豈惟工賈不逮亦非不肖士人

之所能及雖寵榮非其所慕而獎賞要當有加其令州縣有司擇老農之勤勞儉樸身無過舉者歲舉一人給以八品頂帶榮身以示鼓勵

諭直省總督巡撫社倉之設原以備荒歉不時之需用意良厚然往往行之不善致滋煩擾官民俱受其累朕意以為奉行之道宜緩不宜急宜勸諭百姓聽其自為之而不當以官法繩之也近聞各省漸行社倉之法貯蓄於豐年取資於儉歲俾民食有賴而荒歉無憂朕心深

為嘉悅但因地制宜須從民便是在有司善為倡導於前留心稽核於後使地方有社倉之益而無社倉之害此則爾督撫所當加意體察者也

雍正三年

諭大學士等古者視歲之上中為儲蓄之節蓋官民經畫久遠不為一時苟且之計積之於豐年用之於歉歲所謂有備無患法良而意美也朕自臨御以來宵旰勤求無刻不以民依為念乃重農積粟之詔屢下而閭閻卒

少蓋藏官倉亦多虧缺即如直隸保定等府去歲頗稱有秋今春二麥亦熟乃以夏秋雨水過多田禾被澇而民間遂有饑色幾至流離若非多方賑卹窮民必至失所此皆草野無知食不以時用不以禮但快目前之有餘罔計異日之不足一遭旱澇追悔無從至於常平通倉原為備荒而設乃有司奉行不力多至缺額罪何可逭茲據江南浙江江西湖廣福建河南山西陝西廣東廣西雲南貴州等省督撫報稱今歲秋成八九十分不

等朕覽奏不勝慰悅又重為吾民計及長久宜乘此時
講求儲蓄之道以備將來該督撫等可轉飭有司通行
曉諭務摶節愛惜各留餘地預為他時緩急之需社倉
之法亦宜趁此豐年努力行之勿但視為虛文故事朕
為吾民籌畫養贍之道惓惓於懷無時或釋而吾民自
謀其身家若但苟且因循不復長顧遠慮則重負朕軫
念元元之意矣至於州縣倉儲向有虧缺者若不趁此
豐收之時速行買補將來發覺斷不姑貸慎之

雍正四年

諭內閣國以民為本民以食為天朕即位以來念切民依
舉行耕藉之禮殫竭精誠為民祈穀於

上帝乃雍正二年三年藉田特產嘉禾有至一莖九穗者
朕心亦以為偶然之事今據府尹劉於義進呈今歲藉
田所產自一莖雙穗三穗以至八穗九穗皆碩大堅好
異於常穀朕見之心甚慰悅今特宣示廷臣朕並非以
此為祥瑞誇耀於衆也蓋實有見於天人感召之理捷

於影響無纖毫之或爽朕以至誠肫懇之心每歲躬耕
藉田以重農事即蒙

上帝降鑒疊產嘉穀以昭休應似此八穗九穗之穀豈人
力之所能強為亦豈人君所能強之使有乎天人感應
之理朕見之最真最切但恐此心不誠耳誠則未有不
動者即如從前青海蠢動朕為邊陲憂慮虔禱於宮中
不數旬而捷音即至疆圉寧謐又如前歲夏間近畿雨
澤稍愆朕在宮中默禱減膳修省虔誠叩懇不數日而

甘霖大沛禾稼有秋此皆近年以來朕親行親驗之事
至於去年夏秋之間時常陰雨朕在宮中但覺雨水稍
多不知其大為民患而李維鈞並不將畿輔被潦實情
具奏是以朕竟不聞知未曾早為虔禱殫竭誠心以挽
天意而紓民困及蔡珽署直隸總督事務詳悉奏聞朕宵
旰憂勤幾廢寢食於是截漕發倉多方賑濟京城設廠
各邑興工俾窮民皆得餬口是以地方雖被水災而小
民不致流離失所朕撫綏憫恤之念寔為迫切今歲二

麥豐收禾黍暢茂此皆

上天俯鑒朕衷故加惠黎元而錫以盈寧之慶也蓋天生民而立之君鑒觀在上人君一念敬謹政事無闕天必嘉之佑之一念放逸政事有乖天必儆之戒之此一定之理也況人君撫馭臣庶位處極尊所以賞罰之者獨有上天耳是以朕每於水旱等事皆寔心內省必係朕有過失

上天儆戒示譴也至於各省旱澇之事朕皆視同一體原

無彼此之別惟是地方相隔路遠彼地偶有水旱有司未必即行具報及至奏達朕前而緊急之時已過是以朕無從盡其誠心為之祈禱此其責則全在本省督撫矣督撫受朕委任之重為朕養育萬民必視百姓之疾苦如痛癢之在己身一遇水旱饑饉必思所以致此之由或因本省之政事吏治有闕即思速為改易之或因本省之人心風俗不端即思速為化導之兢兢業業修省祈禱竭盡誠心一如朕之朝乾夕惕斷無不可以挽

回

天意者假若聞朕之政治稍有缺失亦宜直言陳奏不必
隱諱如此則官與民聯為一體臣與君又聯為一體太
和翔洽寔意交孚天聽雖高誠呼吸可通矣朕每歲躬
耕藉田並非崇尚虛文以為觀美寔是敬

天勤民之至意禮曰天子為藉千畝諸侯百畝據此則耕
藉之禮亦可通於臣下矣朕意欲令地方守土之官俱
行耕藉之禮使知稼穡之艱難悉農夫之作苦量天時

之晴雨察地理之肥磽如此則凡為官者皆時存重農課稼之心而凡為農者亦斷無苟安怠惰之習似與養民務本之道大有裨益九卿詳議具奏

雍正五年

諭內閣地方水利關係民生最為緊要如江南戶口繁庶更宜加修濬時其蓄洩以防旱澇向來屢有條奏之人但未經本省督撫奏請朕意亦欲興修以資農務因海塘工程正在營治且水利事關重大必得實心辦事之

人方有裨益即如目今畿輔水利賴有忠誠任事之怡親王始可興此大工否亦未敢輕易舉行也我

皇考念切民依周知稼穡因康熙四十六年巡省江浙所至必細驗水土高下燥濕之宜詳考五穀種植之性躬親講求將附近太湖及通江湖之處條分縷析特頒諭旨令江浙督撫於蘇松常鎮杭嘉湖地方疏濬河港以資灌溉修建牖座以便啓閉皆動用公帑錢糧不使絲毫出於民力恩至渥也乃當時督撫諸臣不能實心仰

體惟以虛文奉行糜費帑金二十餘萬大都飽於官吏之侵漁而無實效深可痛憾朕即位以來事事仰繼

皇考之貽謨永圖生民之遠計本欲俟直隸水利興修之後令怡親王前往浙江地方相度情形商酌興修之舉今巡撫陳時夏特行奏請且稱費用不過十餘萬兩即可成功據陳時夏陳奏應是地方不可遲緩之事副都統李淑德曾任江南松江府同知諳悉水利事宜曾經條奏頗為明晰原任山東巡撫陳世倌年力精壯現在

閒居著李淑德陳世倌會同陳時夏總河齊蘇勒總督
孔毓珣悉心踏勘詳加酌議倘齊蘇勒河工緊要不能
親身前往即行文知會商酌定議具奏凡建立牖座疏
濬河流務期盡除淤塞以杜泛溢之虞廣蓄水泉以收
膏澤之益其一應公費俱動用庫帑支給一切工程交
與李淑德陳世倌監督辦理並諭吏部將現任部屬及
候選部屬府州縣人員內有具呈願往效力者挑選十
餘人帶往江南不必令出資財唯令辦理事務交李淑

德陳世倌二人酌量委用特諭

諭內閣修舉水利種植樹木等事原為利濟民生必須詳諭勸導令其鼓舞從事方有裨益不得繩之以法若地方官員因關係考成督課嚴急則小民轉受其擾矣著直隸學臣轉飭教職各官切加曉諭不時勸課使小民踴躍興作若地方官員怠忽不加勸導或有逼勒過嚴者著學臣稽察奏報三路巡察御史亦著善為勸導悉心稽察如地方官有奉行不善之處即據實奏聞

諭內閣據范時繹奏稱太倉州鎮洋縣士民僉稱境內劉河鉅工已蒙發帑開浚而七浦一河原係民田沾獲其利今願照依舊例業主給食佃戶出力不敢再費帑金等語朕思君民原屬一體民間之生計即國計也倘遇國用不敷之時勢不得不資藉於民今國家財用充足朕為地方畫萬世之利不惜多費帑金興修鉅工養育百姓若仍用民力以辦公事非朕本心也況小民效力工程或致荒其本業而又不免官吏之督催煩擾朕心

深為不忍著將范時繹所奏士民捐助之處停止仍動用公帑辦理並將朕旨徧行曉諭州縣士民等當體朕愛養元元之心於工程告成之後加意照看歲歲疏濬俾地方永受其益則勝於目前之趨事赴工多矣

諭內閣朕聞陝西鄭渠白渠龍洞向來引涇河之水溉田甚廣因歷年既久疏濬失宜龍洞與鄭白渠漸至淤塞堤堰大半坍塌醴泉涇陽等縣水田僅存其名深為可惜特令該督岳鍾琪詳酌興修今據該督親勘奏稱龍

諭內閣閩廣兩省督撫常稱本省產米甚少不足以敷民

食總督高其倬亦曾具奏巡撫楊文乾則云廣東所產

之米即年歲豐收亦僅足供半年之食朕思本省之米

不足供本省之食在歉歲則有之若云每歲如此即豐

收亦然恐無此理或田疇荒廢未盡地力或耕耘怠惰

未用人功或奸民希圖重價私賣海洋三者均未可定

昨曾面諭九卿今廣西巡撫韓良輔奏稱廣東地廣人

稠專仰給於廣西之米在廣東本處之人惟知貪財重

利將地土多種龍眼甘蔗烟葉青靛之屬以致民富而

米少廣西地瘠人稀豈能以所產供鄰省多人之販運等語此奏與朕前旨相符可知閩廣民食之不敷有由來矣著二省總督巡撫等悉心勸導俾人人知食乃民天各務本業盡力南畝不得貪利而廢農功之大不得逐末而忘稼穡之艱至於園圃菓木之類當俟有餘地餘力而後為之豈可圖目前一時之利益而不籌畫於養命之源以至緩急無所倚賴而待濟於鄰省假使鄰省亦或歉收則又將何如哉該督撫等務須諄切曉諭

善為化導俾愚民豁然醒悟踴躍趨事則地方不致虛耗而米穀不致匱乏矣每見各省督撫大吏皆各私其所轄之地方而於鄰省之休戚膜外視之如高其俾則請運江南之米於福建陳時夏又欲留貯於江南楊文乾則欲運廣西之米於廣東韓良輔又欲留貯於廣西伊等各從疆界起見甚屬褊小朕君臨萬方普天率土皆吾赤子一省米穀不敷自然接濟於鄰省有無相通古今之義若封疆大吏各據本地實情奏聞則朕易於

辦理倘各存偏向本省之見不肯通融接濟則朕辦理甚難若開捐納以積穀則地方米價必致高昂若截漕米以濟民則天庾所關更為緊要輾轉思維寔無善策是在凡為督撫者體朕一視同仁之意酌地方之緩急為有無相通之道勿以隔屬有心區別如此方不愧大臣公忠之誼而於國家懷保小民之治大有裨益也

諭內閣自古帝王致治誠民莫不以重農為先務書陳無逸先知稼穡之艱難詩載豳風備述田家之力作論語

卷四十八
云百姓足君孰與不足孟子曰民事不可緩也蓋國以民為本民以食為天農事者帝王所以承天養民久安長治之本也我國家撫綏寰宇

聖祖仁皇帝臨御六十餘年深仁厚澤休養生息戶口日增生齒益繁而直省之內地不加廣近年以來各處皆有收成其被水歉收者不過州縣之數處耳而米價遂覺漸貴閩廣之間頗有不敷之慮望濟於鄰省良由地土之所產如舊而民間之食指愈多所入不足以供所

欽定四庫全書

可以種植五穀之處則當視之如寶勤加墾治樹藝菽粟安可舍本而逐末棄膏腴之沃壤而變為菓木之場廢饔飧之恒產以倖圖贏餘之利乎至於烟葉一種於生人日用毫無裨益而種植必擇肥饒善地尤為妨農之甚者也小民較量錙銖但顧目前而不為久遠之計故當圖利之時若令其舍多取寡棄重就輕必非其情之所願而地方官遽然繩之以法則勢有所難行轉滋紛擾惟在良有司勤勤懇懇諄切勸諭俾小民豁然醒

糴買之使重農務本之良民獲利而有餘資也朕生平
愛惜米穀每食之時雖顆粒不肯拋棄以朕玉食萬方
豈慮天庾之不給而所以搏節愛惜者實出於天性自
然之敬慎並不由於勉強且以米穀乃上天所賜以生
養萬民者朕為天下生民主惟有敬慎寶重仰冀天心
默佑雨暘時若歲獲有秋俾小民家有蓋藏人歌樂土
朕既為億萬生民計不敢輕忽天貺爾等紳衿百姓獨
不自為一身一家之計乎朝夕生養之需既受上天之

賜若果加意愛惜隨時撙節則天必頻加錫賚長享盈寧之福若恣情縱欲暴殄天物則必上干天怒不蒙眷賚而水旱災祲之事皆所不免其理豈或爽哉又聞江西廣西地方竟有以米穀飼養豚豕者試思穀食之與肉食孰重孰輕孰緩孰急而乃以上天之所賜小民終歲勤苦之所獲者為豢養物類之用豈不干天和而輕民命乎朕所以惓惓訓諭者惟期天下之人專務本業以杜浮靡愛惜物力以圖永遠共體朕敬迓天庥勤恤

民隱之意則爾等家室必至於豐饒爾等子孫必永綿其福澤思之思之母忽朕言著將此曉諭內外官民人等並通行遠鄉僻壤咸使聞知

諭直省總督巡撫稼穡為天地之寶民命攸關我

聖祖仁皇帝臨御六十餘年無刻不以重農力穡為先務仰觀天文俯察地理辨土性而課人功咨雨暘而防旱潦綢繆區畫旰食宵衣偶遇雨澤愆期

聖心憂勞之切侍側臣子皆惶悚不寧所以為萬世謀粒

食者至矣盡矣朕朝夕瞻仰者四十餘年今續承大統
竭誠效法念切民依每年虔祀先農躬耕帝藉仰蒙

上天眷佑疊錫嘉禾信而可徵纖毫不爽是以特頒諭旨
令各省守土官共舉耕耤之禮為萬方百姓祈禱秋成
今見各省督撫奏報前來處處風雨均調春麥秋禾並
登豐稔雖邊遠荒僻之地亦慶有秋惟直隸湖廣安徽
數州縣近水最低之處常年被潦者畧有沒注亦不為
災是今歲可稱大有年矣朕感

上帝之垂慈慶下民之受福而推求其故良由今年各省
初耕藉田各該有司自然小心謹慎齋戒虔誠是以感
格上蒼而獲此盈寧之錫倘從此益加敬謹不懈初心
則歲歲屢豐可以預必爾督撫等可通行曉諭所屬官
民當凜帝鑒之匪遙勿視耕藉為故事永矢嚴恪以迓
天和天下臣民受福斯朕之福也思之慎之毋忽朕言
雍正六年

諭內閣朕惟善政養民利賴必資地力而率作興事倡先

端藉縉紳惟茲寧夏所屬之插漢拖灰地廣土饒水利
充裕朕特遣大臣會同該督撫等悉心經理濬治渠道
設縣築城募民墾種次第修舉行見人民樂業饒裕殷
阜漸成西北蕃庶之區此朕經國裕民之至計欲使地
無遺力而亦寧夏一方人數千百年未興之樂利也聞
彼中得水可墾之地計二萬餘頃每戶以百畝授田可
安置二萬戶朕已諭令廣行召募遠近人民給以牛具
籽種銀兩俾得盡力開墾給為世業惟是原議寧夏本

籍現在出仕文武官員俱令開墾授業俾為世享之利
今聞報墾者尚覺寥寥禮記曰貨惡其棄於地也力惡
其不出於身也況乎上以急公而裕國下以力本而厚
生縉紳小民之望也果能身先倡率則民間之趨事赴
功者必衆凡屬本籍之人不論文武官員或現任或家
居均當踴躍從事急先墾種不可觀望因循耽延善舉
凡茲所墾地畝俱照原議給為世業三年起科果能使
沃壤腴田有廣收之益無閒曠之區則不但於體國經

野之謨重有攸賴而經營世產伊等子孫亦蒙永遠之澤矣

雍正七年

諭內閣農事為國家首務督責貴有專司前有人條奏於各省設立農官以司勸課或設巡農御史令其巡行郡邑勸勗農人及時力作亦足敦本業而防游惰等語朕思各省耕作之情形不同未可一例通行現今畿輔之地營種水田以來收穫甚多行之已有成效設立巡農

御史之事當先行於直隸省每年特差御史一員於二月田功初起之時巡歷州縣查察農民之勤惰地畝之修廢以定州縣之考成其有因循推諉以致荒廢農田者即行叅處該御史亦勤加勸課督令耕耘九十月間稼穡納場之後回京覆旨至明年二月照例另派一員前往其該御史出巡一切供給車馬俱照現今巡察御史之例按日給發務使農桑興修田功畢舉游手之人咸歸南畝以副朕重農務本之至意

諭直省督撫國家承平日久戶口日繁凡屬閒曠未耕之地皆宜及時開墾以裕養育萬民之計是以屢頒諭旨勸民墾種而川省安插之民又令給以牛種口糧使之有所資藉以盡其力今思各省皆有未墾之土即各省皆有願墾之人或以日用無資力量不及遂不能趨事赴功徘徊中止亦事勢之所有者著各省督撫各就本地情形細加籌畫轉飭有司作何勸導之法其情願開墾而貧寒無力者酌動存公銀穀確查借給以為牛種

口糧俾得努力於南畝俟成熟之後分限三年照數還
項五六年後按則起科總在該督撫等董率州縣因地
制宜實心經理務使田疇日闢耕鑿維勤以副朕愛養
元元之至意

雍正八年

諭內閣據署理陝西總督查郎阿奏稱安西沙州等處地
方招民屯墾仰蒙天恩賞給沿途口糧盤費借給牛具
籽粒房價又因民到沙之日尚未耕種借與七箇月糧

欽定四庫全書

年以來備極籌畫經營期其得所今從民戶到齊之日
計算至辛亥之歲乃例當輸賦之期但念小民甫經安
插公私兼顧為難著寬期二年於癸丑年升科俾民力
寬裕俯仰有資以副朕格外加恩至意

諭內閣寧夏地方萬民衣食之源在於大清漢唐三渠之
水利是以定例每年疏濬修理使水流暢足民田得以
均灌溉聞得歷年專司之員疎忽怠玩只圖打草折夫
以致閘道堤岸逐漸損壞時有衝決渠身淤泥填塞日

見淺窄而三渠之中惟唐渠為尤甚近來其口過低其
稍過高水勢不能逆流而上多悞小民耕種之期雖每
春定有歲修之例然不能以一月之工程整數十年之
荒廢也前因署事通判靳樹鋸玩忽渠務已被叅革治
罪其從前積年損壞之處亦復不少若再不加補築恐
日復一日將來難於經理現今兵部侍郎通智開濬惠
農昌潤二渠於寧夏水利自然明晰著會同史在甲即
行查議今歲預備物件明春動工修補務令三渠堅固

俾邊郡黎元灌漑有資永享盈寧之慶其作何估計動用錢糧之處著兵部侍郎通智太常寺卿史在甲詳悉妥議具奏

諭直省督撫古稱蝗蝻生於水澤之中乃魚子變化而成者是以江南淮揚之州縣地接湖灘往往易受其害蓋蝗之所生多因低窪之區秋雨停集生長小魚交春小魚生子水存則仍復為魚若值水涸日曬入夏之後即化為蝗不待數日便能生翅羣飛即被害之家亦莫知

其所自蓋以其地寥廓荒涼人跡罕至平時忽而不察
及至鼓翼飛颺則有難於撲滅之勢此事勢之必然所
當防之於早者也凡直省地方向時有蝗蝻之害者該
督撫大吏應轉飭有司通行曉諭附近居民於大熱久
晴之後週歷湖濱窪地及深山窮谷無人之處實心實
力審視體察一有萌動之機無分多寡即行剪除消滅
倘民力或有不敷即稟報該地方官督率人工協同助
力更令文武官弁派出誠實兵役會同里長者民等留

心察視不可疎忽怠玩如此則人力易施蟲灾可杜於禾稼大有裨益但小民愚昧無知又復苟且庸惰其曉諭開導防患於未然者有司不得辭其責實心任事之良吏必不肯於此等事膜外視之也

諭內閣據直隸地方文武官員報雨奏摺稱今年三月及四月初旬兩次得雨今於四月二十四日又得時雨四野霑足二麥茂盛秋穀皆可播種等語據此則四月以前竟有未種之田可知矣夫農事貴乎及時二月土膏

初動三月即為播種之期況已得雨二次何以遲延觀望直待四月下旬方始播種倘小民怠惰偷安為民父母者則當開導勸課使之踴躍趨事於南畝又或耒耨牛力稍有不敷則當留心體察設法相助不使有後時之歎即以今歲論之若從前三月得雨之時即爭先種播則目今又得甘霖豈不更為優渥況雨澤之遲早有無非人力所能預料今蒙

上天再賜甘霖得以乘時播種實屬萬民之厚幸假若霖

雨愆期徬徨觀望則從前之急愔遲延豈非小民自誤
生計自荒恒產耶西北寒冷之鄉布穀或不宜太早若
畿輔可以早種之地又當甘雨既霖之時而乃袖手逍
遙以待時雨之再沛不亦愚昧之甚乎況北直地方春
夏之交嘗稽雨澤豈可視甘澍為等閒不及時努力致
虛

上天之賜乎此皆愚民習於懶惰而地方有司又不以民
事為重漠然不加董率之故著該督撫傳朕諭旨通行

之陋習著將四月完半者寬至六月十月全完者寬至十一月俟夏麥秋禾築場納稼之後從容完課俾民力舒徐以副朕愛養黎元之至意

雍正九年

諭內閣山東地方上年遭值水患窮民乏食朕心軫念屢頒諭旨並遣大臣賜粟賜金加恩賑濟不忍使一夫不獲其所又念該省上年禾稼歉收今春青黃不接之時米價必至騰貴特命截留鄰省漕糧三十五萬石並撥

運奉天米穀二十萬石減價平糶以惠濟閭閻朕之為
東省民食計者亦備極籌畫矣今朕細思上年濟兗東
三府之被水較平時為甚目今發粟平糶在糶米之家
固不慮價值之高昂而赤貧之民仍苦於糶買之無力
且聞被水之後覓食窮民有轉徙四方者今各省漸次
資送回籍此等民人回籍之後無以為存養之資必至
於失業深屬可憫今朕再沛恩膏著侍郎劉於義牧可
登巡撫岳濬確查實在窮民無力糶買穀石者加給兩

箇月口糧以恤其困苦資其耕作查濟兗東三府尚有
存倉穀四十萬石即將此為散賑之需儻不敷用再將
截留之漕米以二十萬石平糶以十五萬石增添散賑
劉於義牧可登岳濬可仰體朕心遴選賢員作速分途
辦理使黎民均沾實惠並傳宣朕旨切加曉諭百姓等
受朕格外之恩當乘此春和努力耕種勿因失業而作
邪僻之事勿因困阨而懷怨尤之心果能祇遵朕訓則
良善之風豫順之氣自能感召天和賜以安全之福思

之勉之

諭內閣今年五六月間直隸山東河南等處雨澤愆期朕
即慮及上年被水低窪之地魚子存留今夏烈日蒸曬
恐變為蝗蝻為禾苗之患特令大學士等寄信與直隸
山東督撫嚴飭屬員留心訪察預為防遏茲據沈廷正
奏報山東濟寧州之南鄉新店等處有蝻子萌動已飭
令文武員弁上緊撲滅又據張元懷奏稱光州所屬竹
園內生有青蟲其形似蝗吞食竹葉未傷田禾今已捕

除等語從來蝗蝻始生之時以人力治之尚易而小民
耽逸偷安憚於用力又恐踐踏禾稼瞻顧逡巡及至飛
颺之後遠近蔓延而勢已不可遏矣是在實心任事之
官員督率鄉民力為捕治不得姑順輿情釀成大患著
直隸山東河南江南等處督撫通行所屬實力奉行儻
視為具文苟且塞責將來飛颺之時朕必察其發生之
處將該地方官從重治罪不少寬貸直隸山東河南三
省欽差大臣科道等一同留心訪察毋忽

諭內閣朕以直隸山東河南夏間雨澤愆期特命截漕查賑預謀民食既而三省陸續奏報得雨朕心稍慰茲聞直隸山東及河北彰衛二府有窮民因秋成無望預為渡河而南以圖就食者蓋因本地歉雨之時尚未聞截漕查賑諭旨輒思就食他省若即令資遣還鄉恐時屆仲秋耕種之期已過轉致失所著該撫飭令沿河州縣於各渡口詳詢其所欲往地方有力不能自達者量給路費仍知照該州縣善為安插除有親朋可依及已傭

工得食者聽其自便外其乏食之民著用截漕米石照例計口賑給此等流民有聞家鄉近日得雨欲回本籍者即資送遣回其未願即歸者俟來春耕種之後仍皆給以資糧使之回籍凡資給之費俱照例動用存公銀兩造冊送部有浮冒尅扣等弊該撫指名題叅如各省樂善之家有能將覓食窮民存恤周濟及資助回籍者該地方官詳報上司酌量輕重獎給花紅旗匾最優者給之頂帶以示鼓勵直隸山東地方既經得雨又現今

截漕查賑人心安帖必無輕去其鄉者設或愚民無知
聞鄰省安插流民經理得宜仍復接踵而至離鄉棄業
舍本籍自有之恩澤以望澤於他鄉其勢必至兩誤該
地方官務悉心安集剴切曉諭令其勿離故土又聞渡
河流民有欲往湖廣者楚地雖產米之鄉而去直隸山
東較豫省更遠恐將來回籍愈難除已至湖廣者著該
地方官安插得所外其尚在鄰省者詢明湖廣果有親
朋可依則資給令往否則即於所到地方安插夫率土

蒼生皆吾赤子各該督撫及地方有司務須痼瘼乃身體察周詳規畫盡善期無一夫不獲其所以副朕勤恤民隱子惠元元之至意

雍正十年

諭大學士九卿京師自上冬以及新春未得雨雪畿輔地方及近京各省雖有奏報得雪者看來亦未普遍霑足因思上年十一月十五日月食據欽天監觀候曾引占書燕趙早禾麥有傷之語陳奏朕前朕心甚為憂懼擬

於正月祈穀之期虔禱

上帝以迓天和乃朕躬偶感風寒醫家奏請避風靜攝是以未曾躬親祀典此心愈加乾惕維茲數月以來雨雪未降顯係

上天垂象以示警甚可畏也朕虔誠修省體察政治之闕失以期仰格

天心爾大學士九卿等各宜恪慎齋戒至誠虔禱尤當洗心滌慮殫職奉公以為敬

天祈福之本京師為四方輻輳之地民食浩繁更宜預為
籌畫至於該督撫等各自敬謹修省外所屬地方雨澤
之有無播種之遲早務期悉心訪察先事圖維儻二麥
歉收必有思患預防之策不使黎民有乏食之虞方不
負朕之委任儻有玩忽隱飾等弊經朕訪聞必加嚴譴
內外大臣等領此諭旨務在實心奉行不必以空言覆
奏

諭內閣寧夏為甘省要地渠工乃水利攸關萬姓資生之

策莫先於此是以朕特遣大臣督率官員等開濬惠農
昌潤二渠又命修理大清漢唐三渠以溥萬民之利年
來昌惠二渠及唐渠工程漸次告竣於民田大有裨益
其大清渠漢渠雖未竣工然聞連年加謹堵疊極力挑
濬已足以資灌溉不過泮岸閘座有應行修補之處可
以從容經理非比唐渠之必應速成也目今甘省軍興
之際輓運兵糧正需車輛若因修理渠工有欽差官員
催趲工程又復僱車運送物料恐小民承應一切力難

兼顧有誤春耕所當酌量變通以體恤民隱者查寧夏有專司水利之同知著將未竣之渠工交與該員照通智史在甲等所估料之處於每歲春工內分年陸續修理再令寧夏道鄂昌勤加督率不時稽查務期工程堅固利濟有資使民田永霑膏澤通智史在甲將各件與鄂昌交代清楚即行回京其在工効力之文武官弁交與該署督查郎阿計其在工之久暫訪其奉職之勤惰量其辦事之能否應留陝題補委用者留陝題補委用

應咨部請旨者咨部請旨應發回本地者發回本地其現任武弁及兵丁等派撥渠工効力者俱令各歸營汛在工夫役等交與鄂昌將附近者令歸南畝遠來者酌量遣回

諭內閣上年冬間北方雨雪稀少朕恐今夏蝗蝻萌動已密諭該督撫等留心防範頃聞江南淮安府屬之山陽阜寧及海州所屬之沐陽揚州府屬之保應等縣各有一二鄉村生發蝻子雖目前萌動之處不過數里然恐

捕治不力漸至蔓延為田禾之害著該督撫嚴飭有司督率人役鄉民速行撲滅俾無遺種儻有怠忽從事者即行糾叅從重議處

諭內閣據山東巡撫岳濬奏稱東省自閏五月內甘雨溥降從前被旱之處次第均霑穀豆雜糧皆得及時佈種此後六七兩月雨澤均調秋禾暢茂現今收穫登場為歷年未有之豐熟等語今歲春月東省郡邑雨澤愆期而兗東二府為尤甚朕心憂慮遣官發粟糶賑兼施從

前嗷嗷待哺之民有所依恃心志安帖豫順之氣感召
天和遂得連霈甘霖轉荒歉而為豐稔即目前之事觀
之益知朕平日切切以天人相感之理訓示天下臣民
者確乎其不爽也民為邦本食為民天凡為官者思欲
感召天和必以暢悅民情為本平時與百姓同其好惡
不使閭閻有抑鬱之情偶值雨暘之不均旱潦之將兆
即據實奏聞俾朕早為百姓經營以為補救挽回之策
在民則當安分循理共敦善良偶遇災祲即思招致之

有由恐懼警惕不敢因困苦而生愁怨之心如此上下
交修官民胥勉將見和氣致祥災沴不作比戶享盈寧
之福矣勉之勉之

諭內閣據博爾奔察等奏稱胡倫布爾等處今歲所種地
畝因旱歉收俟明年多為種植等語朕思種地一事若
交與伊等則訓練兵丁必致貽誤著行文將軍卓爾海
於齊齊哈爾愛渾墨爾根三處臺丁及水手屯丁內酌
派五百名動用彼處存貯正項錢糧撥給盤費並置辦

犂具籽種等項前往胡倫布爾地方於明年春間及時耕種至秋後將如何收穫之處著卓爾海據實奏聞其動用銀兩仍著報部照數解還

雍正十一年

諭內閣上年江南沿海被水地方如常熟等二十二州縣並續報之華亭等六縣該督撫等已遵旨撫綏軫恤定議大賑三次每次以一月為期料寒冬初春以來窮民存養有資不致失所矣朕念二三月間正青黃不接之

時尚須籌畫接濟資其力作庶可無悞春耕著再加賑四十日以昭格外之恩其有從前遺漏貧民並先可餬口而目下力不能支者亦著查明添入補賑之內再被水之鹽場竈戶亦照貧民例加賑一月該督撫鹽政等務須督率有司實力奉行使被水之家均沾恩澤以副朕恤災拯困之至意

諭內閣前據署直隸總督顧琮等奏請准順天天津等七府五州酌量領運北倉米石以備平糶並將所存倉穀

存七糶三以濟民食朕已允行今思目下正當青黃不接之時糧價漸昂各處皆有常平倉穀其存貯米穀一萬石以外者准其存七糶三一萬石以內者准於糶三之外酌量加增存貯甚少者或添運北倉漕米或撥領鄰近倉儲務令各處米價得平小民易於糶買再者直隸冬春雨雪稀少目今農事方殷民皆盡力於南畝恐新舊錢糧一時難於並徵著將雍正九年以前帶徵銀兩緩至秋收完納該督等遵諭即辦理

諭戶部近聞山東通省雨澤俱已霑足但從前有得雨稍遲之州縣今年二麥歉收民力未免拮据況得雨之後無力耕種錢糧輸納承辦維艱朕心軫念著該督將得雨稍遲之州縣衛所應徵新舊錢糧緩至秋成之後再行開徵以示朕體恤閭閻之至意

雍正十二年

諭戶部據總理西安巡撫事史貽直等奏報陝省秋禾受旱水田仍可收而旱田收成分數大減現今秋社前

後乃秦民種麥之期必得甘雨應時始能播種是以農夫望雨甚切等語覽所奏情形若將來得雨需足則明歲夏收自有可望但今歲秋收既歉則明年青黃不接之時米糧或至騰貴兵民人等有應行接濟之處亦未可定亦不可不預為籌備查陝省與河南接壤雍正十一年春間撥運豫米十萬石自水次裝載直抵西安已有成效上年曾令河東總督王士俊於沿河州縣水次貯穀三十萬石並將上年豫省漕米截留易穀以備陝

省之用是豫省備用陝省之米甚為充裕儻明年陝省有需用之處著史貽直等一面具奏一面即將需用米數行文王士俊料理照上年之例由水道運赴西安應用將此併諭王士俊知之

諭大學士九卿朕從來不言祥瑞屢頒諭旨曉諭天下臣民是以數年來凡以嘉祥入告者朕皆屏拒弗納而各省之瑞穀嘉禾誕降者甚多悉令停其進獻蓋欲天下臣民共敦實行不尚儀文以為敬

天勤民之本也今據總兵官楊凱奏報鎮筵紅苗甫經向
化今年苗民所種之山田水地黍稷稻粱盈疇遍野及
至秋成則皆雙穗三穗四五六穗不等萬畝皆然苗民
額手歡呼以為從來未有之奇瑞又據侍郎蔣洞奏報
高臺縣屬雙樹墩地方在鎮夷堡口外自開墾以來人
烟日盛今歲秋成粟穀挺秀有一本之內枝抽十餘穗
者有一穗之上叢生五六穗者屯農共訝為奇觀稱為
盛事等語朕思苗疆播種乃夷民務本之先資遠徼屯

田闢邊塞軍儲之重計今值經營伊始欣逢瑞穀呈祥
且地廣穗多超越於見聞紀載之外仰見

天心眷佑錫福方來苗民之樂利可期軍旅之糗糧有賴
此非空言祥瑞而無濟於實用者可比朕心不勝感慶
在廷臣工莫不有撫綏苗衆籌邊足食之心聞之定為
色喜是以將楊凱蔣洞奏摺及穀本圖樣發出共觀之
皇帝敕諭

雍正十三年

諭總理事務王大臣從來帝王撫育區夏之道惟在教

養兩端蓋天生民而立之君原以代天左右斯民廣
其懷保人君一身寔億兆羣生所托命也書稱正德
利用厚生惟和又云惟土物愛厥心臧蓋恒產恒心
相為維繫倉廩實而知禮義理所固然則夫教民之
道必先之以養民惟順天因地養欲給求俾黎民飽
食暖衣太平有象民氣和樂民心自順民生優裕民
質自馴返樸還淳之風可致庠序孝弟之教可興禮

義廉耻之行可敦也我朝

列聖敬

天勤民垂統萬世

皇祖聖祖仁皇帝六十餘年久道化成重熙累洽所以惠
養元元禮陶樂淑者至周至備惟是國家承平日久
生齒日繁在京八旗及各省人民滋生蕃衍而地不
加廣此民用所以難充民產所以難制也我

皇考宵旰孜孜勤求治理惟恐一夫不獲其所重農貴粟

之教屢頒撫循蠲賑之惠頻下南北之營田水利無
不興修內外之開墾種植無不綜理凡此實政實心
一以誠敬貫徹始終十三年有如一曰皆朕所親承
目睹拳拳服膺者也朕生長深宮瞻依

皇考慈顏惟知承歡膝下懋學書齋即如日用衣食之需
悉由

恩賜豐贍饒裕不煩問所從來此固

皇考昊天罔極之恩難於明言而為君之道亦惟身履其

地者然後知聖人之言為至當也今朕續成大統身

為人主衣租食稅則自今伊始一絲一粟皆四海小

民所經營供御者矣朕思飲饌被服皆出於海內脂

膏宮室器用皆取自閭閻拮据尚安忍少有糜費侈

用之心以蕩民力而耗民財乎又安忍已垂裳而聽

天下之民有寒不得衣已玉食而聽天下之民有飢

不得食者乎禹思天下有溺者由已溺之稷思天下

有飢者由已飢之自古聖君賢臣自任之重者皆動

於至誠迫於至理有萬不容已者也朕日夜兢兢時
厯本固邦寧之至慮以

皇考之實心為心以

皇考之實政為政凡供膳品味之類無所加增衣食器用
之屬無所濫費宮室苑囿之區無所改營爰賴中外
大臣共體朕心以成朕志於民生日用所由阜成民
生樂利所由豐豫之處在在求其實濟事事謀其久
遠勿以虛名而澤不下逮勿以小利而計不圖全勿

作無益以害有益勿朕民生以厚己生果能恒產有
資將見恒心自啓我

皇考聖訓所謂三代之治必可復堯舜之道必可行者庶
能繼述萬一此朕中心乾惕之誠並非即位之初為
此邀譽近名之語以博天下臣民之感頌朕心務收
實效豈肯徒托空言但天下至大兆民至衆非朕一
人所能獨理內而閣部八旗大臣外而督撫藩臬有
司均受國家深恩有惠養斯民之責者當共思黽勉

崇儉戒奢視國事如家事以民身為己身痼瘕一體
休戚相關各殫誠心期登斯民於衽席則賞功酬庸
之典朕必從優舉行若苟且因循視同膜外律以溺
職更復何辭勉之勉之

乾隆元年

諭總理事務王大臣三代以前不言水利溝澮之制時
蓄洩備旱潦尚書周禮所載為田功計者其利甚溥
開渠引水溉田育穀始於戰國蓋因阡陌既開溝澮

尋丈已失其舊也歷代言水利者得失參半總以相
土宜順水勢近不擾民遠可利人為主今江南所屬
蘇松常鎮四府太倉一州現在興修支河倣河工海
塘之例督撫分委降革廢員及本籍候選考職人等
効力承修朕思渠港圩壩附近溉田原宜開濬以備
旱澇但開濬之法須河身深廣蓄洩得宜其挑取塗
泥遠移他處或培窪下之地或築堤岸之上方為久
計若雇夫挑土堆貯河旁雨淋水潦旋即入河不久

淤塞務名無實徒滋煩擾至古堤舊渠儻遇旱澇不
為田害便宜仍舊紛更改築甚無謂也今蘇松等處
內地支河原不比河工海塘之險古堤舊渠如元和
至和等塘民利往來田資灌溉至今受益吳本澤國
三江震澤支流四溢如丘與權單諤邨亶趙霖夏原
吉周忱等所論水利考据精核得失瞭然今効力承
修人員相度形勢諳練自遜前人儻有夾塘蓄水石
梁洩河止宜加修不必改築若有必應開濬建築之

處督撫留心細勘並飭州縣協辦工程一應調遣指
臂易使至長洲等州縣按畝派錢以供大修朕已降
旨停止倘有官吏藉端中飽即絲毫派累經朕訪聞
必加嚴處嗣後督撫以至州縣建言為民興利或利
小而害大或利在目前而害伏於後或有利無害而
其事易創難成皆宜詳審熟籌慎之於始以體朕惠
養元元至意

乾隆二年

諭總理事務王大臣方今農事將興正百姓力田耕作時也茲二月二十二日恭送

孝敬憲皇后梓宮往

泰陵所過州縣應納錢糧雖已蠲免但恐應役多人致妨南畝其令地方有司毋得先期派民灑道清塵種種滋擾扈從人員有蹂躪麥苗途中滋事者許直隸總督即令劾奏以副朕惠養農民至意

諭總理事務王大臣上年直隸等省有收成歉薄之州

縣冬春以來雨雪又覺缺少惟山東奏報得雨似可
足用其餘則尚未沾足朕心甚為憂慮當此青黃不
接之時東作方興之候正宜急為籌畫以恤民艱已
諭令各該督撫因地制宜或減價平糶或借貸倉糧
凡有利益民生者即速定議舉行毋容忽視今思仲
春之月即定例開徵錢糧之時若有司遵例催科在
有力之家尚可勉強輸將而困乏之家實為艱窘深
可憫惻著直隸等省督撫將去歲歉收之州縣一一

確查所有現在應完錢糧暫停徵收俟麥秋酌看收成情形再行奏聞歸併秋季錢糧項下帶徵完納如此則地方無追呼之擾民力可以寬舒農功不致有曠該部遵諭速行

諭總理事務王大臣農事方興需雨甚殷雖十五日得雨尚未霑足朕心深為顓望著傳諭禮部虔行祈禱諭總理事務王大臣京師雨澤愆期朕心深為憂慮聞河南山東兩省與直隸接壤之地雨亦稀少該撫等

作何預為籌畫又近日曾否得雨俱未詳悉奏聞實為輕視民瘼可著侍衛永興前往河南松福前往山東再各派戶部司官一員馳驛同往面詢該撫將實在情形并如何料理之處一一陳奏永興等亦著沿途留心從前得雨分數此時乾旱情形地畝曾否播種米價如何騰貴以及百姓情形若何之處著回時據實覆奏

諭總理事務王大臣昔者虞廷咨牧食哉惟時而百揆

盜等案或官方吏治兵制夷情能盡其心者有之其
以身為之倡課百姓以農桑本務者誰耶得毋與虞
廷命官之意相左乎朕欲驅天下之民使皆盡力南
畝而其責則在督撫牧令必身先化導毋欲速以不
達毋繁擾而滋事將使逐末者漸少奢靡者知戒蓄
積者知勸督撫以此定牧令之短長朕即以此課督
撫之優劣至北五省之民於耕耘之術更為疎畧是
以一穀不登即資賑濟斯豈久安長治之道其應如

何勸戒百姓或延訪南人之習農者以教導之牧令
有能勸民墾種一歲得穀若何三歲所儲若何視其
多寡為激勸非奇貪異酷極昏極庸者毋輕率劾去
使久於其任則與民相親而勸課有成將見俗返醇
樸家有蓋藏然後禮樂政刑之教可漸以講習著該
部會同九卿詳悉定議以聞

欽定授時通考卷四十八

欽定四庫全書薈要卷一萬七百十二

子部

欽定授時通考卷四十九

勸課

本朝重農

祈穀

謹案月令天子以元日祈穀於上帝蓋人君代天
理物欽若敬授未有不以農事為先務我

國家修明典禮尤重民生

太宗文皇帝繼天立極肇祀

郊壇

世祖章皇帝創業垂統乘時定制每歲孟春上辛祈穀于上帝一切典禮與冬至大祀同

聖祖仁皇帝釐定樂章禮文大備康熙二十八年復

命另撰祈穀祝文將肫懇恤民之意切實祈求

世宗憲皇帝視民如傷盡誠盡敬每歲

躬祀

郊壇為民請命

天心協應叠降嘉祥薄海內外無不食德飲和仰蒙

福佑我

皇上御極以來闔澤覃敷深仁普洽蠲免賑恤之典史
不勝書凡閭閻之疾苦稼穡之艱難無弗洞悉周
知厘懷夙夜

齋宮淵穆對越精誠

皇衷之懇至肫勤視小民望歲之心尤切于萬萬惟

上帝監觀四方惟

列聖陟降左右錫茲祉福粒我蒸民至誠感神呼吸通于
帝座理固然矣蓋以民事為已事以

天心為已心

聖聖相承道同心一非明煙將享之文所能擬諸形容也

謹照

大清會典及禮部所定現行儀注載

祈穀禮儀於後

祈穀儀

凡上辛

祈穀前後儀節陳設順治初詳定遵行惟配享

神位遞增儀亦遞備今照題請儀注具列於後

一前期五日詣犧牲所視牲

皇帝親詣行禮遣官視牲

一前期三日太常寺官進齋戒牌銅人

皇帝致齋三日各衙門俱設齋戒牌應陪祀王以下各

官齋戒如常儀

一前期二日遣禮部堂官一員省牲

一前期一日

皇帝陞太和殿

視祝文

視玉

視帛

視香行禮復至龍亭前上香行禮太常寺官送祝文玉

帛香至

天壇神庫內青案上安設

一前期一日禮部都察院太常寺光祿寺官俱朝服上香監宰牲並瘞毛血

一正祭日鹵簿大駕全設

皇帝御禮服出宮乘輦

駕進

壇西門降輦至更衣幄次更祭服盥手畢進

大享殿內就拜位王以下陪祀各官俱序列燔柴迎

帝神奏中平之章

皇帝陞

壇詣

上帝香案前上香次詣

太祖高皇帝

太宗文皇帝

世祖章皇帝

聖祖仁皇帝

世宗憲皇帝位前上香畢旋位行禮唱奠玉帛樂奏肅平

之章

皇帝陞

壇詣

上帝位前獻玉帛次詣

太祖高皇帝

太宗文皇帝

世祖章皇帝

聖祖仁皇帝

世宗憲皇帝位前奠帛畢旋位唱進俎樂奏咸平之章

皇帝陞

壇以次進俎畢旋位行初獻禮樂奏壽平之章

皇帝陞

壇詣

上帝位前獻爵畢讀祝官跪讀畢

皇帝行禮復詣

太祖高皇帝

太宗文皇帝

世祖章皇帝

聖祖仁皇帝

世宗憲皇帝位前獻爵禮畢旋位行亞獻禮樂奏景平之

章

皇帝陞

壇以次獻爵如初獻儀禮畢旋位行終獻禮樂奏永平之章

皇帝陞

壇以次獻爵如前儀獻畢旋位太常寺官唱

賜福胙

皇帝就位受爵受祚行禮旋位復行禮謝福胙徹饌樂奏凝平之章捧玉官捧蒼璧退送

神樂奏清平之章

皇帝行禮職事官捧祝帛香饌恭送燎位望燎樂奏太平之章

皇帝詣望燎位祝帛焚帛奏禮畢

皇帝由東甕門出更衣陞輦設鹵簿大駕教坊司作樂奏祐平之章

皇帝還宮

樂章

迎

帝神樂奏中平之章

惟帝勤民兮求莫匪舒
小民何依兮黍稷與與

元日有事兮百辟趨
為民請命兮食咸需

遙瞻龍駕兮歷紫虛
日臨黃道兮東風徐

臣深昭事兮遑寧居
願垂嘉惠兮大有書

奠玉帛樂奏肅平之章

民天惟食兮農事先
粒我蒸民兮有大田

風霆流形兮雨澤霑
實穎實粟兮氣化全

玉帛祗奏兮祗禋虔

仰祈寰宇兮享豐年

進俎樂奏咸平之章

鼎烹兮苾芬

嘉薦兮無文

奉雕俎兮大武

羶薌建兮氣干雲

昭普存兮民力

惟明德兮馨聞

初獻樂奏壽平之章

初獻兮旨酒盈

著誠致潔兮犧尊盛

儼對越兮在上

惟昭明兮有融

瑟黃流兮玉瓚

帝心歆假兮賚嘉禎

亞獻樂奏景平之章

著尊啓兮告虔

清醑次第兮舉前

禮再獻兮肅拜

列瑤觴兮秩斯筵

神悅懌兮如在

惠我嘉生兮福便便

終獻樂奏永平之章

終獻兮泰尊移

苾芬嘉旨兮圭瓚交馳

神既醉止兮錫祉

禮成於三兮陳詞

願灑餘瀝兮沐羣黎

臣拜于兮望雲霓

徹饌樂奏凝平之章

俎豆具陳兮庶品齊

舉荷昭鑒兮靡或遺

饌告徹兮玉几

登歌洋溢兮式禮無違

肅微忱兮告終事

上帝居歆兮錫純禧

送

帝神樂奏清平之章

祇奉天威兮弗敢康

小心翼翼兮昭穹蒼

雲垂九天兮露瀼瀼

翠旂羽節兮歸何鄉

臣拜下風兮意徬徨

願沛汪澤兮時其雨暘

望燎樂奏太平之章

翹首兮天閭

邈彼雲海兮何蒼茫

炳蕭束帛兮薦馨香

精誠咸格兮降福穰

四時順序兮百穀以昌

臣同兆姓兮感荷恩光

皇帝還宮導迎樂作奏祐平之章

皇天有命

列聖承之

我后配德

文匡武綏

海隅寧謐

神靈宴娛

于萬斯年

流慶降釐

耕藉

謹案仲春耕藉以供粢盛以重農事甚盛典也我朝

列聖相承勤民務本

世祖章皇帝智勇天錫統一寰宇順治十一年

躬祀

先農行耕藉禮

欽定一切儀章為萬世法

聖祖仁皇帝聖神文武仁孝性成康熙十一年耕藉行告

祭

奉先殿禮

世宗憲皇帝仁育義正宵旰憂勤雍正二年以後每歲躬耕三推禮畢再行一推以示率先農功至意藉田嘉禾歲生至有十三穗者蓋

精誠感格若斯之盛也又

命直省郡邑各設藉田所在官吏遵行惟謹故自

開國以來大有頻書海內家給人足比隆于唐虞三代之盛我

皇上至誠大孝念切民依乾隆三年行耕藉禮四年照例舉行億萬斯年著為定例開蒸民粒食之源充六宇太和之氣山農野老熙熙然相忘于擊壤鼓腹之下者皆

聖主敬

天法

祖肫勤教育之深恩也謹遵照

大清會典及禮部所定現行儀注載

躬祀

先農壇

耕藉禮儀於後

祭

先農壇儀

皇帝舉耕藉禮則

親祭

先農壇其每年常祀定于春二月

順治十一年二月

世祖章皇帝行耕藉禮親祭

先農壇康熙十一年二月

聖祖仁皇帝行耕藉禮親祭

先農壇前期遣官告祭

奉先殿一應禮儀俱與順治十一年同雍正二年二月

世宗憲皇帝行耕藉禮親祭

先農壇一應禮儀與康熙十一年同以後每年舉行

乾隆三年二月

皇上行耕藉禮親祭

先農壇前期親祭

奉先殿四年二月

上親行耕藉禮如前儀

一前期二日太常寺官進齋戒牌銅人

皇帝致齋二日王以下陪祀各官俱齋戒二日

一前期二日太常寺官視牲

一前期一日

皇帝御中和殿視祝文畢太常寺官捧祝版送至

先農壇神庫內安設

一前期一日禮部都察院太常寺光祿寺官赴

壇監視宰牲瘞毛血

一正祭日

皇帝具禮服乘輦至

壇進具服殿盥手畢至

壇上黃幄次立王以下陪祀各官俱排立迎

神樂奏永豐之章

皇帝陞壇上香行禮初獻奏時豐之章職事官獻帛爵

讀祝畢

皇帝行禮亞獻奏咸豐之章終獻奏大豐之章各獻畢

奏

賜福胙

皇帝受爵受胙行禮謝福胙徹饌樂奏屢豐之章送
神樂奏報豐之章

皇帝行禮職事官捧祝帛香饌送座位樂奏慶豐之章
皇帝親視奏禮成退次行耕耜禮

樂章

迎

神樂奏永豐之章

勾芒秉令

土牛是驅

天下一人

蒼龍駕車

念彼田疇

民命所需

生成有德

尚式臨諸

奠帛初獻樂奏時豐之章

先農神哉

耒耜教民

田祖靈哉

稼穡是親

功德深厚

天地同仁

肅將幣帛

肇舉明煙

厥初生民

萬彙莫辨

神錫之庥

嘉種乃誕

執茲醴齊

農功益見

玉瓚椒醑

肅雍舉奠

亞獻樂奏咸豐之章

上原下隰

百穀盈止

粒我烝民

秀良興起

樂舞具備

吹豳稱兕

再躋以獻

肴饔酒旨

終獻樂奏大豐之章

靡芑秬秠

維神所貽

以神饗神

曰予將之

秉耒三推

東作允宜

五風十雨

率土何私

徹饌樂奏屢豐之章

於皇農事

自古為烈

莫敢不承

今茲忻悅

邊豆既豐

簠簋云潔

神視井疆

執事告徹

送

神樂奏報豐之章

麻麥芄芃

秔稻連阡

縱橫萬里

皆神所瞻

人歌鼓腹

史載有年

歲有常典

弗祿綿延

望瘞樂奏慶豐之章

玉版蒼幣

來鑒來歆

敬之重之

藏於厚深

典禮由古

予行自今

樂樂利利

國以永寧

耕藉儀

凡耕藉儀節係順治十二年題定康熙十一年增
告祭

奉先殿典禮雍正二年頒定樂章

一

躬耕藉田必用亥日

一前期一日遣官告祭

奉先殿

一

皇帝躬祭

先農壇行耕耤禮於前期

視祝版日設

皇帝耕耤耒耜鞭種青箱綵亭三座設三王九卿從耕
青箱綵亭四座於

午門外戶部禮部堂官同順天府堂官入進器具穀
種於

太和殿下安設

皇帝陞中和殿行

閱視祝版禮畢

皇帝御保和殿戶部堂官先捧

皇帝耕耤耒耜次捧鞭次捧稻種匣安設于

中和殿殿內正中次捧三王耕耤麥種匣穀種匣九
卿耕耤豆種匣黍種匣安設于

中和殿內左右畢

皇帝自保和殿陞中和殿至各陳設處

閱畢還

宮戶部官捧耒耜穀種各匣至

太和殿階下授順天府捧出

午門左門置各綵亭內教坊司作樂前導送至耕藉

所安設

一是日早

皇帝致祭

先農壇畢

御具服殿更補服黃龍袍少憩從耕三王九卿及不從耕王以下各官俱更蟒袍補服禮部太常寺堂官奏請

皇帝詣耕藉位南向立從耕三王九卿各就耕位立不從耕王以下各官俱在耕藉蓆棚外按翼排立耕藉耒耜鞭青箱綵亭三座及三王九卿青箱綵亭四座陳設左右教坊司領樂官四員頂帶老人四名歌三十六禾詞樂工十二名鑼鼓板樂工六名

執義執扒執帚執鉞蓑衣斗篷樂工二十名五色
彩旗樂工五十名順天府耆老三十四名上農夫
十名中農夫十名下農夫十名俱兩旁排立鴻臚
寺官贊進耒耜戶部堂官北向跪進耒耜

皇帝右手秉耒贊進鞭順天府尹北向跪進鞭

皇帝左手持鞭耆老二人牽牛上農夫二人扶犁禮部
太常寺鑾儀衛官恭導

皇帝秉耒行耕藉禮教坊司樂工鳴鑼鼓歌三十六禾

詞招颺彩旗唱和隨行

皇帝三推三返再行一推禮畢贊受耒耜戶部堂官跪
受耒耜贊受鞭順天府尹跪受鞭各置綵亭內禮
部堂官奏請

皇帝旋位立戶部堂官順天府尹執青箱播種耆老隨
後覆土畢順天府尹以青箱置綵亭內禮部堂官
奏請

觀耕

皇帝御觀耕臺南向坐不從耕王以下各官分翼序立
三王各五推五返各用耆老一人牽牛農夫二人
扶犁順天府廳官隨後播種耕畢三王退就班位
立諸王等俱候

旨序坐次九卿各九推九返各用耆老一人牽牛農夫
二人扶犁順天府廳官及兩縣各官隨後播種耕
畢九卿退就本班立順天府官將青箱置左右所
設三王九卿盛種綵亭內禮部堂官奏耕耜禮畢

駕興由東階出

先農門外陞輦教坊司作導迎大樂至

齋宮陳設大樂作

皇帝陞座暫

御後殿王以下公以上在臺上文武各官在臺下東西

向按翼排立禮部堂官奏請

御齋宮樂作

皇帝陞座順天府官兩縣官耆老農夫等由西門入

排立贊行三跪九叩頭禮農夫三十人服本等服
色各持農器隨後行禮丹陛樂作禮畢退至耕所
農夫終畝候耕畢府縣官至東門報終畝畢鴻臚
寺官跪奏

親耕既成禮當慶賀王以下各官排班丹陛樂作贊行
三跪九叩頭禮禮畢退就班行一叩禮序坐

賜茶畢大樂作

駕興御後殿光祿寺設宴畢大樂作

皇帝陞座王以下各官就原位行一叩頭禮序坐進宴
丹陛樂作奏雨暘時若之章安宴桌畢進酒西簷
下作管絃樂笙簫合奏奏五穀豐登之章

皇帝舉酒王以下各官于本位跪行一叩頭禮復坐進
饌東簷前作清樂奏家給人足之章徹樂王以下
各官排班聽贊行一跪三叩頭禮丹陛樂作禮部
堂官奏禮畢王以下各官出

齋宮大門外排立恭候

皇帝乘輦出鹵簿大駕前導教坊司作還宮樂奏祐平
之章

皇帝還宮

耕藉三十六永詞

光華日月開青陽

房星辰正呈農祥

帝念民依重耕桑

肇新千藉考典章

吉蠲元辰時日良

蒼龍鑾輅臨天閭

青壇峙立西南方

犧牲簠簋升芬芳

皇心祇敬天容莊

黃幕致禮虔誠將

禮成移蹕天田旁

土膏沃洽春洋洋

黛犁行地牛服韁

司農種稔盛青箱

洪縻在手絲鞭揚

率先稼穡為民倡

三推一墾制有常

五推九推數遍詳

王公卿尹咸贊襄

甸人千耦列雁行

耰鋤既畢恩澤滂

自天集福多豐穰

來牟蕎薿森紫芒

華薺赤甲私稈秬

秬秠三種黎白黃

稷粟堅好碩且香

糜芑大穗盈尺長

五菽五豆充隴場

稌粢糜粳九色糧

蜀秫王黍魚東廩

烏禾同收除童梁

雙岐合穎邊理疆

千箱萬斛收神倉

四時順序百穀昌

八區九有富蓋藏

歡騰億兆感聖皇

皇帝進宴奏雨暘時若之章

祥開黼座兮布瓊筵

笙歌迭奏兮天樂宣

三推既舉兮賜豐年

五風十雨兮時不愆

優渥霑足兮溉大田

皇心悅豫兮福祿綿

皇帝進酒奏五穀豐登之章

龍犁轉兮春風生

帝勤稼穡兮供粢盛

戒農用兮勸服耕

富教化行兮百穀成

禾九穗兮麥兩莖

黍稷重穰兮充棟楹

歲登大有兮怡聖情

堯樽特進兮玉醴盈

勞酒禮飲兮邁鎬京

皇帝進膳奏家給人足之章

嘉禾炊饌兮雲子芳

仙厨瓊粒兮七箸香

吾皇重農兮禮肅將

明昭感格兮錫嘉祥

千倉萬箱兮百穀穰

崇墉比櫛兮遙相望

豐亨樂利兮遍八方

家多充積兮野餘糧

含哺鼓腹兮化日長

朝饗夕飧兮壽而康

萬邦同慶兮璿圖昌

直省耕藉儀

雍正五年題准耕藉儀注頒行直省各擇東郊官地潔淨豐腴者立為藉田如無官地動支正項錢糧置買民田以四畝九分為藉田即於藉田後建立

先農壇供奉

神牌收貯祭品選擇勤謹農夫二名免其差役酌給口糧令居

壇西配房看守朝夕灑掃每歲耕藉之日祭

先農壇禮畢各官俱更蟒袍補服省城督撫秉耒知縣
執青箱知府播種府城知府秉耒佐貳執青箱知
縣播種知州正印官秉耒佐貳執青箱播種專城
衛所用正印官秉耒如無屬員即選擇耆老執青
箱播種耕時用耆老一人牽牛農夫二人扶犁俱
照九鄉之例九推九返農夫終畝耕畢各率耆老
農夫行望

闕三跪九叩頭禮其農具俱用赤色牛用黑色箱用

青色所盛籽種悉從各處土宜即著守

壇宇農夫灌溉耨田地方官不時勸課將每年所收
米穀及用過糞盛數目造冊報布政司送戶部查
核至各省耕耨日期每年十月初一日頒時憲書
後交欽天監選擇吉期禮部奏請

欽定通行奉天府府尹直隸各省督撫轉飭所屬同日
舉行永著為令

豐澤園演耕儀

耕藉之前二日

皇帝詣

豐澤園演耕是日禮部尚書順天府府尹各率其屬
穿蟒袍補服於耕所祇候青箱穀種照例陳設

皇帝御龍舟至先詣


時應官拈香畢至耕所順天府府尹進鞭

皇帝扶犁三推御前大臣侍衛襄事禮畢

皇子諸王學習農事

駕回宮內務府官員終畝

欽定授時通考卷四十九



總校官庶吉士臣侍朝

校對官編修臣裴謙

謄錄監生臣倪時慶

謄錄舉人臣董凝極